



**Giuanne Gavinu Vasco at bìnchidu sa XIV
editzione de su Prèmiu Literàriu “Gurulis
Vetus “ de Pàdria**

de Domitilla MANNU

Sa poesia pro su cantu, in custa fràsia simple b'est su sensu de cussu chi distinghet, su Prèmiu Literàriu “Gurulis Vetus” de Pàdria dae totu sos àteros. Su Prèmiu lompidu a sa de XIV editziones, est nàschidu pro ammentare unu fizu mannu de custa biddu, Gavinu De Lunas giamadu su “Rusignolu de Pàdria”, unu de sos cantadores pius mannos chi amus àpidu in Sardigna, mortu in su 1944 in Roma in su ochidorzu de sas “Fosse Ardeatine”. Sàpadu 24 de austu 2013 a sas 6 e mesa de bortadie, s'est tenta sa tzerimònia de premiatzione in sa corte de su tzentru sotziale, a ue at atopadu zentòria meda. Su sùndigu, Antoni Sale at espressadu peràulas de cuntentu pro sa resessida de su Prèmiu, chi annu cun annu cunfirmat de èssere agradessidu e pretziadu dae sos mezus poetas sardos chi bi leant parte imbiende sas òperas issoro. At torradu gràtzias a issos, a sa Regione e a sa Provìntzia, a sos padriesos e massimu a totu a sa giuria cumposta dae: Paulu Pillonca, (Presidente) Antoni Maria Pinna, Anna Cristina Serra, Tonino Oppes e Maria Lucia Mele. Fit presente su Retore de s'Universidade de Tàtari Attilio Mastino, chi at saludadu, fatu sos cumplimentos e at informadu chi s' Universidade at cuncordadu cun sa Regione sarda chi siat garentidu s'impreu de sa limba sarda in sos cursos dae parte de sos professores; s'est acabada gasi sa cuntierra chi b'est istada, intre sas duas istituziones, in custos ultimos annos. Su giornalista Tonino Oppes at faeddadu de s'importàntzia de su Prèmiu pro sa cultura, sa limba sarda e pro Pàdria, biddu in ue sunt nàschidas pessones chi ant fatu onore a sa Sardigna. Paulu

Pillonca at tentu firma s'atintzione de sos presentes cun s'arregonada sua, chi est istada pretziada meda, subra a Gavinu De Lunas, sa poesia, su cantu e sa netzessidade de rennoare sos testos de sas cantones in sas garas de càntigu a chiterra. Est istadu imprentadu su librigheddu cun totu sas poesias binchidoras e dadu a s'indonu a onzune de sos presentes.

Custos sunt sos poetas premiados:

- I prèmiu Giuanne Gavinu Vasco de Bortigale cun " Un'isprigu 'e luna"
- II prèmiu Giuanne Piga de Nùgoro cun " A luore 'e lampizu..."
- III prèmiu Sarvadore Murgia de Macumere cun " Tres beranos"

Mentziones de onore a:

- Dominigu Mela de Casteddu Sardu cun " Sempri ti pensu"
- Giuanne Antiogu Mura de Bilartzi cun " Chie setzit a caddu est suzetu a nde ruer"
- Dante Erriu de Silius cun sa poesia "Tristu pipiu"
- Dominigu Anghelu Fadda de Tiesi cun "Prendas mias istimadas"
- Giuanne Soggiu de Bunnannaru cun "Bolos arcanos "



Giangavino Vasco - Premio "Gurulis Vetus" di Padria

UN'ISPRIGU 'E LUNA (I Prèmiu)

In custa nott' 'e luna
una frina lizera
mi ferit e mi ninnigat s'ammentu
de te, donosa e bruna,
donandemi sintzera
su bene pius mannu ch'apo tentu.
E innoghe ti bio,
comente a cando a costas ti tenio.

E torrat su lugore
a tingher sas aeras
cun su colore tèbiu 'e su gosu
de cuss'antigu amore,
ch'ancora, si l'ischeras,
regollo intr' 'e su pettus disizosu.
E su calore intendo,
ca d'esser solu contu non mi rendo.

Sa luna birgonzosa,
in altu si ce cuat
dae segus de nues passizeras;
e tue, disizosa,
si su chelu s'annuat,
in sos carignos mios torra isperas.
Cando forte t'astringo,
a rundare in sos bisos mi custringo.

Ma s'assulenu meu
est vana illusione;
una l'àmbriga infustu m'at su chizu.
Sensadu est su recreu
de sa durche 'isione
chi cunfortadu m'at solu un'aizu.
E un'isprigu 'e luna,
colàndeche mi nat "Bona fortuna".

Tàtari 25/8/2013